

元和郡縣圖志卷第二十九

唐 李吉甫 撰

江南道五

湖南觀察使 潭州 衡州 郴州 永州 連州 道州

邵州

福建觀察使 福州 建州 泉州 漳州 汀州

潭州

長沙

開元戶二萬一千八百

鄉六十九

今為湖南觀察使理所

管州七 潭州 衡州 郴州 永州 連州 道州

邵州

縣三十四

禹貢荊州之域春秋時為黔中地楚之南境秦并天下分黔中

元和郡縣圖志卷二十九 江南道五

以南之沙鄉為長沙郡以統湘川

下言長沙郡地者皆禹貢荊州之域楚之南境也 按

東方朔記南郡有萬里沙祠自湘川至東萊地可萬里故曰長

沙漢初以吳芮有功封長沙王至景帝封其子發為王因入朝

有詔諸王迭起舞王但張裊而已帝怪而問之對曰臣國小地

狹不足以回旋帝悅益以武陵桂陽二郡自漢至晉並屬荊州

懷帝分荊州湘中諸郡置湘州南以五嶺為界北以洞庭為界

漢晉以來亦為重鎮今按其俗雜有夷人名猺自言先祖有功

免徭役也隋開皇九年平陳改為潭州取昭潭為名也又置總

管府大業中罷牧置都尉府三年罷為長沙郡武德四年又置

潭州總管府七年改為都督府

州境

東西一千六十里 南北五百七十五里

八到

西北至上都二千四百四十五里 北至東都二千一百八十五里

正南微東至衡州四百六十里
北至岳州水路五百五十里
東南至袁州五百二十五里
西北至朗州四百里
東至洪州九百八十里

貢賦

開元貢 葛布十五匹
元和貢 絲布十五匹

管縣六 長沙 醴陵 瀏陽 益陽 湘鄉 湘潭

長沙縣

郭下

本漢臨湘縣屬長沙國隋改為長沙縣屬潭州

嶽麓山在縣西南隔湘江水六里蓋衡山之足也故以麓為名

雲母山在縣北九十里列仙傳長沙雲母服之不朽

銅山在縣北一百里楚鑄銅處

昭山在縣南七十里臨湘水下有旋潭甚深無底州之得名因此也

湘水南自衡山縣界流入於岳州湘陰縣界

元和郡縣志卷二十九 江南道五

故尉城在縣西北七十里孫權以程普為長沙縣西部都尉以防關羽因立此城

故陶關在縣西南五里晉杜弢據湘州反陶侃討之因置此城

賈誼宅在縣南四十步

吳芮墓在縣北四里

陶侃墓在縣南二十三里

醴陵縣

中下 西北至州一百八十里

本漢臨湘縣地禹貢岷山導江東別為

沱又東至于醴是也後漢置此縣屬長沙郡吳封顧雍為長沙侯而家人不知是也隋平陳省入長沙武德四年復置

瀏陽縣

中下 西至州二百五十里

本漢長沙國臨湘縣地吳置瀏陽因縣

南瀏陽水為名隋平陳廢景龍二年復置

益陽縣

上 東南至州一百八十里

本漢舊縣屬長沙國在益水之陽因名

隋平陳屬潭州

瀘水一名茱萸江南自邵州流入經縣南三十步縣西有關羽瀨南對甘寧故壘昔羽屯兵水北孫權令魯肅甘寧拒於此水寧謂肅曰羽聞吾咳唾之聲必不敢渡渡則成擒也羽夜聞寧處分曰與霸聲也遂不渡茱萸江

益水出縣東南益山東北流入瀘水

關羽故壘在縣西一十五里

湘鄉縣緊西北至州二百三十里本漢湘南縣之湘鄉也後漢立為縣屬

零陵郡自吳至陳並屬衡陽郡隋省入衡山縣武德四年復置石魚山其石色若雲母開發一重石若魚形刻畫燒之作魚膏臭在縣西一十五里

龍山有鍾乳穴在縣南二百四十里

漣水在縣南四十五里資水一石得鹽五升

湘潭縣緊東北至州一百四里陸路一百二十里本漢湘南縣地吳分立衡陽縣

晉惠帝更名衡山歷代並屬衡陽郡隋改屬潭州天寶八年改

名湘潭

涓湖溉良田二百餘頃縣西七十里

湘水經縣理東

衡州衡陽上開元戶一萬三千五百一十三鄉四十四元和戶一萬八千四十七鄉四十四

秦屬長沙郡漢為酃縣地吳分長沙之東部為湘東郡晉以郡屬湘州隋開皇九年罷郡為衡州以衡山為名

州境東西六百五十里南北四百九十九里

八到西北至上都二千九百五十里北至東都二千六百四十九里

東北至吉州九百一十里東南至郴州三百七十里

東南至郴縣界七百三十八里
正南微西至永州五百七十里
北至潭州四百六十里
西至邵州三百五十六里
貢賦 開元貢 元和貢 麩金 水銀 大麻 紵絲

管縣六 衡陽 攸 茶陵 耒陽 常寧 衡山

衡陽縣緊郭下 本漢酃縣地吳分置臨蒸縣屬衡山郡天寶初更

名衡陽郡縣仍屬焉縣城東傍湘江北背蒸水

响嘯山即衡山也在縣北七十里

湘水西南自永州祁陽界入

蒸水自臨蒸縣北東注於湘謂之蒸口

酃湖在縣東二十里可釀為酒晉紀武帝平吳薦酃酒於太廟是也

蒸陽故城在縣西一百七十里

元和郡縣圖志卷二十九 江南道五

四

攸縣下 西南至州陸路三百四十五里 本漢舊縣武德四年分湘潭縣置以北

帶攸溪為名

茶陵縣中 西南至州水路四百五十里 本長沙國界齊永明七年入湘東郡

隋開皇九年為湘潭縣武德四年置茶陵縣貞觀九年廢聖曆

元年復舊因南臨茶山縣以為名

耒陽縣上 西北至州一百六十八里 本秦縣因耒水在縣東為名漢屬桂陽

郡隋改為耒陰屬衡州後漢蔡倫即此縣人有宅基在縣西一

里

雨瀨在故縣西南每旱賽之則雨降

常寧縣下 西北至州陸路一百八十里 本秦耒陽縣地吳分耒陽置新平縣

宋元徽中三洞蠻抄掠州縣移就江東因蠻寇止息遂號新寧

即今理是東府潭水西枕宜江天寶元年改名常寧

湘水在縣北六十里

衡山縣上西南至州一百二十里本漢陰山縣以縣東一百二十里有陰

山為名至梁武帝天監中分陰山立湘潭縣天寶八年改為衡山

湘水在縣東

衡山南嶽也一名岫嶁山在縣西三十里南嶽記曰衡山者朱陽之靈臺太虛之寶洞又云赤帝館其嶺祝融託其陽以其宿當翼軫度應機衡故為名又曰上如車蓋及衡軛之形山高四千一十丈

衡嶽廟在縣西三十里南嶽記曰南宮四面皆絕人獸莫至周迴天險無得履者漢武帝移於江北置廟隋文帝復移於今所

郴州桂陽中開元戶三萬二千一百七十六鄉五十元利戶一萬六千四百三十七

元和郡縣志卷二十九 江南道五

五

本漢長沙國地後漢分長沙南境立桂陽郡理郴縣領十一縣隋平陳改為郴州大業中復為桂陽郡武德四年為郴州

州境東西五百九十六里南北三百二十三里

八到西北至上都三千二百七十五里北至東都三千一百五十五里西至道州五百三十五里東至虔州一千里

東南至韶州四百一十里西北至衡州三百七十里

貢賦開元貢細白紵元利貢細白紵

管縣八 郴 義章 義昌 平陽 資興 高亭

臨武 藍山

郴縣上本漢舊縣項羽徙義帝之所都也歷代屬郴陽郡郭下屬郴州

桂陽監在城內每年鑄錢五萬貫

馬嶺山在縣東北五里昔蘇耽學道於此得仙其舊宅在城東半里俯臨城餘跡猶存

石井山在縣東北八十里有風母獸既死張口向風則生

劉洞在縣西北二十三里出偃鼠如牛將為災乃出畎畝散落其尾悉為小鼠

淶水自郴侯山注來

程鄉吳錄云程鄉出酒

橫溪水俗謂之貪泉飲者輒冒於貨財

郴水經縣東一里

溫水在縣北常溉田十二月種明年三月熟可一歲三熟

義帝祠在縣南一里墓在縣西一里

義章縣中下 西北至州 一百一十五里本漢郴縣地隋末蕭銑分置屬郴州

元和郡縣志卷二十九 江南道五

六

武德因而不改開元二十三年自縣北移於今理卻據層嶺前臨通江

章水在縣北六十五里

義昌縣中下 西北至州 三百三十里本漢郴縣地至東晉分置汝城縣屬桂

陽郡隋改為扈陽縣天寶元年改為義昌

平陽縣上 東至州 九十九里本漢郴縣地東晉陶侃於今理南置屬平

陽郡至陳俱廢隋末蕭銑分置武德因而不改七年省八年復置

銀坑在縣南三十里所出銀至精好俗謂之倂子銀別處莫及亦出銅鑛供桂陽監鼓鑄

資興縣中下 西至州 一百二十里本漢郴縣地後漢於此置漢寧縣吳改

曰陽安晉改為晉寧至隋省開皇十一年又置改為晉興貞觀

廢咸亨三年又置改為資興南府末江北帶長嶺

高亭縣中下南至本漢便縣晉省陳復置至隋省入郴縣開

皇十三年宇文融奏割郴縣北界置安陵縣安陵水在縣北一百步因以為名天寶元年改為高亭縣以縣東一百三十步高亭山為名

臨武縣中下東北至州本漢舊縣因南臨武溪水以為名歷

代屬桂陽郡後郡為郴州縣屬不改

桐柏山在縣西北六十里

雞水在縣南即桂水也

藍山縣中東北至州本漢南平縣至隋廢咸亨中復置於今

理天寶元年改為藍山縣

九疑山在縣西南五十里

元和郡縣志卷三十九江南道五

永州零陵開元戶二萬七千五百九十九鄉四十八

秦屬長沙郡漢為長沙國武帝分置零陵郡領縣十至宋封晉

恭帝為零陵王隋文帝開皇九年平陳置永州因水為名大業

三年復為零陵郡武德四年又置永州史記舜葬九疑即此也

州境東西三百三十二里

八到西北至上都三千一百五十五里

西南至桂陽五百五里

東北至衡州陸路五百七十里

西至敘州南即溪山懸險不通無里數

東南至道州水路二百六十里

東至韶州六百里

貢賦 開元貢 細葛 石燕

管縣四 零陵 祁陽 湘源 灌陽

零陵縣上本漢泉陵縣地隋平陳改為零陵縣自改零陵故

移於此

湘水經州西十餘里

石室山在縣北一里呂蒙所築

祁陽縣上南至州一百八十里本漢泉陵縣地屬零陵郡吳分泉陵置武

德四年復置於今理貞觀元年省四年又置

石燕山在縣西北一百一十里出石燕充藥

湘水經縣南三十步

湘源縣上東北至州一百三十里本漢洮陽縣地至隋改置湘源縣屬永

州

湘水經縣東

灌陽縣中北至州三百六十里本漢零陵縣地隋大業末蕭銑析湘源縣

置武德七年廢上元二年呂誼奏置

灌水在縣西南一百二里

連州連山開元戶一萬八百八十二鄉二十二

秦為長沙郡之南境漢置桂陽郡至陳為桂陽縣隋文帝開皇

十年置連州因黃連嶺為名大業初改為熙平郡武德四年復

為連州

州境東西二百四十二里南北四百里

八到西北至上都三千六百六十五里東北至東都三千四百五里

東至韶州陸路五百里西南至封州六百三十里

東至廣州八百九十里西至賀州捷路二百七十里取道州桂嶺路三百六十里

東北度嶺至郴州三百九十里

貢賦開元貢細布元和貢鍾乳

管縣三 桂陽 陽山 連山

桂陽縣上中郭下本漢舊縣屬桂陽郡吳宋齊並屬始興郡梁陳屬

陽山郡隋屬連州

貞女峽在縣東南一十里

黃連嶺在縣西南一百五十里

陽山縣中下西北至州水路一百七十四里本漢舊縣為南越置關之邑故其

關在縣西北四十里茂漢口史記尉佗移檄陽山關曰盜兵且

至急絕道聚兵自守今陽山北當騎山嶺路秦於此立陽山關

漢破南越以為縣後漢省晉重置在注水南梁天監六年置陽

山郡以縣屬焉隋開皇十年屬連州神龍二年移於注水北即

今縣理也是界諸山各出乳穴

連山縣中下東至州一百六十里自漢至齊為桂陽郡之地梁武帝分桂

陽置廣惠縣隋開皇十年改為廣澤屬連州仁壽元年改為連

山

滑水今為黃連水

道州江華開元戶二萬七千四百四十四鄉六十元和戶一萬八千三百三十八鄉五十一

秦屬長沙郡漢屬長沙國武帝分長沙置零陵郡吳分零陵置

營陽郡今州是也以郡在營水之南因為名隋末陷寇賊武德

四年平蕭銑置營州貞觀八年改為道州

州境東西二百九十五里

八到西北至上都三千四百一十五里

西北至東都三千一百五十五里

西北水路至永州二百六十里

南踰嶺至賀州四百四十里

正南踰嶺至韶州四百二十里

正東微北至郴州五百三十五里

貢賦

開元貢細紵布

元和貢細紵布

管縣五 弘道 永明 延唐 大曆 江華

弘道縣上郭下本漢營浦縣屬零陵郡隋改永陽縣貞觀八年省入營道縣天寶六年改為弘道縣

大陽原在縣南五十步多小斑竹相傳云舜崩之後二妃尋湘水以手拭淚把竹遂成斑也

營水南自江華縣流入

永明縣中東北至州一百一十里本漢營浦縣隋改為永陽縣武德四年

移於州西南貞觀八年省天后又置天寶元年改為永明

延唐縣上西至州一百里本漢泠道縣地屬零陵郡漢景帝時零陵文

學於泠道舜祠下得玉琯十二是也至隋自奔巢水口移營道縣於此武德四年移營道於州郭內於此置唐興縣天寶元年改為延唐縣

九疑山在縣東南一百里舜所葬也九山相似行者疑惑故為

名舜廟在山下

泠水今名遲水源出九疑山

舂陵故城在縣北五十里長沙定王封中子買為舂陵侯是也

大曆縣中下西北至州二百二十里本漢營道縣地大曆二年觀察使韋之

晉奏析延唐縣於州東置因年號為名

江華縣中北至州一百一十三里本漢馮乘縣地故城在縣南七十里至

隋不改武德四年分馮乘縣置江華縣屬營州八年屬道州

營水出縣東北

淮南王子廟在縣南七十二里荆州記云淮南王安被誅其子

奔至此城門化為石今名東塘神

邵州邵陽開元戶一萬二千三百二十鄉三十元和中戶一萬八百鄉二十二

秦為長沙郡地漢為昭陵縣屬零陵郡吳分置邵郡今州是也

宋齊並為邵陵王國隋開皇十年以邵陵郡屬潭州隋末陷於寇賊武德四年平蕭銑屬南梁州貞觀十年改為邵州

州境東西屈曲一百二十里南北水路七百三十四里

八到西北至上都二千八百八十四里北至東都二千五百八十五里

東北至潭州陸路五百三十里東南至永州二百二十里東至衡州三百五十六里

貢賦開元貢黃蠟麻布元和貢銀

管縣二 邵陽 武岡

邵陽縣上郭下本漢昭陵縣屬長沙國後漢改昭陽縣晉武帝改

為邵陽在邵水之陽故名

武岡縣上東北至州四百三十里本漢都梁縣地屬零陵郡吳寶鼎元年

改為武岡縣因武岡為名一云晉武帝分都梁縣置梁天監元

元和郡縣圖志卷三十九 江南道五

十一

年以太子諱綱故為武強武德四年復舊

都梁山在縣東北一百三十里

福州長樂中都督府開元戶三萬一千六十七鄉六十六元和戶一萬九千四百五十五鄉八十一

今為福建觀察使理所

管州五 福州 建州 泉州 漳州 汀州

縣二十四

禹貢揚州之域本閩越秦并天下以閩中下郡作三十六郡之

數今州即閩中郡之地也下言閩中地者皆禹貢揚州之域漢初又為閩越國

自越王句踐六世至無彊為楚所滅子孫播遷海上七世至無

諸從諸侯之師滅秦率人佐漢漢五年立無諸為閩中王王故

地郡又有冶縣按冶即今台州章安故縣是也後漢改為東侯

官吳於此立曲那都尉主謫徙之人作船於此晉置晉安郡領

縣八屬揚州南朝以封子弟為王梁簡文帝初封晉安王入為皇太子是也陳廢帝改為豐州又為泉州因泉山為名隋大業二年改為閩州三年改為建安郡武德六年改為泉州八年置都督府景雲二年又為閩州開元十三年改為福州都督府因州西北福山為名兼置經略使仍自嶺南道割屬江南東路州境

八到 西北至上都五千二百九十五里

西北至東都四千四百二十四里

東北至溫州水路屈曲一千八百里山路險阻

西南至泉州三百七十里

正北微西至建州六百里

東南水路至海一百六十里

西南至汀州水路屈曲一千三百六十五里

東至大海七十里

貢賦 開元貢 海蛤 蚌蛇膽 賦 絲 絹

元和貢 乾薑 白蕉

管縣九 閩 侯官 長樂 福唐 連江 長溪

尤溪 古田 永泰

閩縣 上郭下 本漢台縣地屬會稽郡後漢改為東侯官吳改屬建安郡晉以侯官為晉安郡隋開皇九年改為原豐縣十二年又改為閩縣皇朝因之

海在縣東南一百六十里

東湖在縣北三里

西湖在縣西二里

侯官縣 緊北至 武德六年於今州西北三十一里置八年廢

長安二年重置貞元五年觀察使鄭叔則奏移於州郭

長樂縣 上西至 本隋閩縣地武德六年分置長樂縣以長安樂為名

石尤嶺縣南四十里與福唐縣分界

大海在縣東七十里

海澶山縣東一百二十里山在大海中周迴三百里

福唐縣緊東北至州水路一百七十里聖曆二年析長樂縣東南界置萬安

縣天寶元年改名福唐

大海在縣東四十五里

丹步渡在縣南一百步其水謂之無患溪

連江縣緊西南至州水路一百六十里本漢冶縣地晉分立溫麻縣武德六

年移於連江之北改為連江縣

連江在縣南三百里東流入海

海在縣東五里

長溪縣中下西南至州水路八百里長安二年割晉溫麻舊縣北四鄉置長

溪縣

長溪在縣南四十五里流入大海

尤溪縣中下東南至州水路八百里開元二十九年開山洞置縣東水路沿

流至侯官縣西水路沂流至汀州龍巖縣

古田縣中下東至州七百里開元二十九年開山洞置東與連江接界

與沙縣分界

永泰縣中下東北至州一百五十里永泰二年觀察使李承昭開山洞置縣

東水路沿流至侯官縣西沂流至南安縣南北俱抵大山並無

行路

建州建安開元戶二萬八百元和戶一萬五千四百八十鄉四十

本秦閩中地也漢於其地立冶縣屬會稽郡後漢改治為東侯

官吳孫休永安二年以會稽郡南部都尉分為建安郡今州即

其地也宋齊梁皆以封子弟為王開元十年罷郡以縣屬泉州

隋氏喪亂建安縣人擁眾自保武德四年歸附遂於建安縣置

建州

州境

八到西北至上都四千六百九十五里
西北至東都三千八百三十五里

正南微東至福州六百里
西北至信州五百四十里
西南至汀州水路屈曲一千五百里

東北至處州水路九百里
西北至撫州八百三十里

正北微東至衢州七百里
貢賦開元貢金花練 焦葛布 賦 緜 絹
元和貢 焦布 偃鼠皮

管縣五 建安 浦城 邵武 將樂 建陽

建安縣上郭下本漢冶縣之地後改爲東侯官又立建安縣遂因不改

建陽溪一名建安水在州西四百步南流入福州界

元和郡縣圖志卷三十九 江南道五

古

浦城縣緊東南至州三百六十里本漢興縣吳永安三年改曰吳興隋平

陳省入建安武德四年又省載初元年復置改曰唐興天授二

年爲武寧神龍元年復爲唐興天寶元年改爲浦城

梨嶺在縣東北八十里與弋陽縣分界

邵武縣上本漢冶縣地吳於此立昭武縣晉改爲邵武

飛猿嶺在縣西一百七十里

邵武溪水源出飛猿嶺東南流經縣西

將樂縣中下東北至州四百五十里吳永安三年置隋開皇九年省武德八

年復立

將樂溪水源出百丈嶺東北流經縣界

建陽縣中東至州一百六十里本上饒縣地吳分置建平縣晉太元四年

改爲建陽隋開皇十年省入建安武德四年重置

建陽溪水源出縣北溫嶺南流經縣界

泉州清源開元戶五萬七百五十四元和戶三萬五千五百七十一

鄉三十四

舊泉州本理在今閩縣武德六年置景雲二年改為閩州開元中改為福州今泉州本南安縣也久視元年縣人孫師業訴稱赴州遙遠遂於南安縣東北界置武榮州景雲二年改為泉州即今理是也

州境東西四百里南北三百三十里

八到西北至上都五千六百九十五里西北至東都四千八百四十五里

東北至福州三百七十里東至大海一百里

西南至漳州三百五十里南至大海一百里

貢賦開元貢蠟燭賦紵布紵麻元和貢綿二十斤蚶蛇膽

管縣四 晉江 南安 莆田 仙游

元和郡縣圖志卷三十九江南道五

十五

晉江縣上郭下開元六年刺史馮仁知緣州郭無縣請析南安縣

東置在晉江之北因名

南安縣緊東至州八十里本漢冶縣地後漢為侯官縣地晉為晉安縣

地陳立為南安縣因縣南安江取以為名

海在縣東南九十里

莆田縣上西南至州一百五十里本南安縣地陳廢帝分置莆田縣隋開

皇十年省武德六年復置貞觀改隸閩州景雲二年割屬泉州

大海在縣東一十五里

仙游縣中南至州一百六十里聖曆二年析莆田西界於今縣北十五里

置清源縣天寶元年改為仙游仍移於今理

仙游山在縣西三十里縣因以為名

漳州漳浦開元戶一千六百九十三元和戶一千三百四十三

鄉一十一

本泉州地垂拱二年析龍溪南界置因漳水為名初置於今漳浦縣西八十里開元四年改移就李澳川即今漳浦縣東二百步舊城是十二年自州管內割屬福州二十二年又改屬廣州二十八年又改屬福州乾元二年緣李澳川有瘴遂權移州於龍溪縣置即今州理是也

州境東西三百七十里南北三百九十里

八到西北至上都六千四百五十里西北至東都五千六百四十里

東至大海一百五十里南至大海一百八十里

西北至潮州四百八十里北至汀州九百里

貢賦開元貢 鯨魚皮 甲香 蠟 元和貢 鯨魚皮

管縣三 龍溪 漳浦 龍巖

龍溪縣中下陳分晉安縣置屬南安郡後屬閩州開元二十九

年割屬漳州縣東十五里至山險絕無路西二十里至山南三里至山北十六里至山

大海去縣五十四里

漳浦縣中下東北至垂拱中析龍溪南界置

龍巖縣中下東北先置在汀州界雜羅口名雜羅縣屬汀州

天寶元年改為龍巖縣大曆十二年皇甫政奏改隸漳州

廢懷恩縣在州西南三百一十里垂拱二年置屬漳州開元二

十九年廢今置鎮

汀州臨汀下元和戶二千六百一十八 鄉一十一

開元二十一年福州長史唐循忠於潮州北廣州東福州西光龍洞檢責得諸州避役百姓共三千餘戶奏置州因長汀溪以為名

州境

八到

西北至上都取建州路六千二百九十五里
西北至東都五千三百三十五里

東北至福州水陸相兼屈曲一千三百六十里

東北至建州水陸相兼一千五百里

東南至漳州九百里

正南微西至潮州一千三百五十里

西至虔州水陸相兼一千二百里

貢賦

開元貢 蠟 偃鼠皮

管縣三 長汀 沙 寧化

長汀縣

中下郭下白石溪水在縣南二百步下流入潮州界

沙縣

中下西南至本宋置屬建安郡隋開皇十六年廢武德四年又置屬建州開元二十三年割屬汀州因沙丘以為名

溪水自縣西來經縣郭東北流入建安溪

寧化縣

中下西南至州六百里本沙縣地開元二十二年開山洞置縣西

與虔化縣接

玄武山在縣北五里